

# كان يا ما كان

مسرحية كوميدية استعراضية

تأليف

تامر عبد الحميد

الكتاب: مسرحية كان يا منيكان  
المؤلف: تامر عبد الحميد  
النوع: أدب عربي  
الطبعة: الأولى/القاهرة 2018م  
المقاس: 20×14  
تدمك: 3 038 977 724 978  
١ - المسرحيات العربية  
٢ - الحداثة (أدب عربي)  
أ - العنوان

فكر يصنع حضارة



صرح للنشر والتوزيع

المدير العام: عبود مصطفى عبود

aboudmoustafa22@gmail.com

ت: 00201122118489 / 00201027879352

البريد الإلكتروني: darsarh@gmail.com

الموقع الإلكتروني: www.dar-sarh.com

رقم الإيداع: 2018/3626

الترقيم الدولي: 3-038-724-977-978

ديوي: 812.008

حقوق النشر محفوظة للناشر

لا يجوز طبع أو نشر أو تصوير أو تخزين أي جزء من هذا  
الكتاب بأية وسيلة إلكترونية أو ميكانيكية أو بالتصوير أو خلاف  
ذلك إلا بإذن كتابي صريح من الناشر.

إهداء

إلى المسرحيين الهواة.. القابضين على الجمر



## مقدمة

ما جدوى الكتابة للمسرح إن كانت جدوى المسرح نفسه مثار شك!

هذا الطرح التشاؤمي لقضية مثل قضية الكتابة المسرحية خصوصا والعمل المسرحي بوجه عام لن يوصل إلا إلى نتيجة واحدة إن تركنا له الفرصة ليتنامى: ذبول الحركة المسرحية رويدا رويدا، ثم توقفها تماما.

ولكن المدهش أن هذا لن يحدث، ولن أدعي أن السبب في عدم حدوثه هو قدرة المسرح نفسه كـ "فن" على الصمود والاستمرار، رغم أن ذلك حدث بالفعل بعد أن استفاد المسرح من تقنيات عديدة منحت القدرة على التطور، ولكن السبب الأول والأقوى هو الفرد، ذلك الإنسان الذي يجد نفسه مدفوعا تجاه هذا الشكل من أشكال التعبير، يكتب ثم يمثل ويرقص ويغني بشغف أمام جمهور من المتابعين الشغوفين بما يقدمه، شغف متبادل بين مُرسل ومستقبل يجدان متعة خاصة في تفاصيل هذه اللعبة الإبداعية الاستثنائية.

لهذا، وبما إنني كفرد من هؤلاء.. نشأت في أحضان المسرح، ومارست كل الفنون المرتبطة به، أعود بعد فترة انقطاع - سلكت خلالها عدة طرق أخرى فنيّة موازية في السينما والتلفزيون - لأكتب هذا النص المسرحي، عودة كانت مُقدّرة لمن تملّك حب المسرح منه، ونصّ استغرقتني فكرته وعوالمه منذ بدأت كتابة الكلمة الأولى به، فلم أفق إلا وقد انتهت المسودّة الأولى منه كاملة في دفقة واحدة.

في هذا النص أحاول ببساطة أن أعقد مقابلة بين نقيضين: (أشياء الأشياء)، و(تشيء الإنسان). ودون خوض في دلالات الشخص أو

استخدام آليات لتحليل النص، وهو ليس دوري بالتأكيد، فإن الفرضية البسيطة التي تنطلق منها فكرة المسرحية وهي (ماذا يحدث لو أن الحياة دبّت في مانيكان)؛ يقابلها حكي بسيط وواضح وبناء درامي كلاسيكي، فقد تعمّدت البساطة والوضوح التي تكاد تقترب من "السطحية"، محاولاً طوال الوقت بالطبع ألا أقع في هذا الفخ، ومولياً الأهمية القصوى لعنصر "الإمتاع" باستخدام الكوميديا والأغاني والإبهار البصري المفترض حدوثه لدى تقديم العرض على خشبة المسرح.

إننا نعيش في وقت أصبح الكثيرون فيه يتعاملون مع بعضهم البعض باعتبارهم "أشياء" لا "أشخاص"، ولم أجد أفضل من الحيلة الدرامية المتمثل في تحويل "شيء" إلى "شخص" لإلقاء الضوء على هذا الخلل، ولم أجد أيضاً قالباً أنسب من "المسرح" لطرح هذه الرؤية، ربما لأنه الأفضل بالفعل، وربما لأنني أبحث عن مبرر يجعلني أعود إلى منزلي الأول ووطني الأم: المسرح.

# الشخصيات

مونيكاً:

مانيكان رجالي مصنوع في كوريا، أسمر اللون، خصلات شعره طويلة ملتفة في ستايل (ريجي)، قوي البنية، قوي التحمل أيضاً، ولكنه بطيء التفكير، غير قادر على اتخاذ القرارات المناسبة.

إيليجانس:

مانيكان حريمي مصنوع في كوريا، ذات طاقة متجددة وكثيرة الكلام وسريعة الملل، تميل للجلوس في أوضاع "غريبة" كالتى اعتادت أن توضع عليها في الفاترينة، اهتماماتها تافهة، ورغم خفة ظلها إلا إنها يمكن أن تتحول سريعاً لشخص كئيب.

شون:

مانيكان رجالي مصنوع في الصين، من جداً ولكن ضعيف التحمل، متوسط القامة ناعم الشعر، رقيق المشاعر، ليس ذكياً ولكنه مستعد لتعلم أشياء جديدة دائماً.

ماركو:

مانيكان رجالي مقاسات كبيرة مصنوع في أمريكا، كان في أحد الفروع الكبرى لتوكيل عالمي، بطيء الحركة سريع الملل كثير التذمر، قليل الكلام إلا في حالة الشكوى، ولكن رغم ذلك يمكن استمالته وإرضاءه بأقل مجهود.

لورد:

مانيكان رجالي مصنوع في إيطاليا في الثمانينات، قادم من أحد المحلات التابعة للحكومة في حدائق القبة والذي تحول لمحل قطاع خاص، أكثر المانيكانات حكمة وتعقلا وتروياً لدرجة تزيد عن الحد أحيانا، غير مستعد لأي نوع من المغامرة غير المحسوبة، يهوى تحليل الأمور والتدقيق في كل صغيرة وكبيرة.

فيرا:

مانيكان طفلة مصنوع في روسيا في السبعينات، قادمة من محل لل (استوك) في أحد شوارع بولاق، هي كطفلة تحب الانطلاق، ولكنها أيضا الأكبوسنا بين الموجودين ولذا لا تعاملهم بالاحترام الذي يتوقعونه، خاصة ماركو، كما ترد عنها تصرفات قد تثير دهشة الباقين سلبا أحيانا وإيجابا أحيانا أخرى.

ستار:

مانيكان حريمي مصنوع في الهند، ذهبت لأكثر من محل في أكثر من مدينة وارتدت أكثر من نوع من الملابس حتى انتهى بها المقام في فاترينة أحد المحلات المتخصصة في بيع ملابس المحجبات في المهندسين، هادئة نوعا ما ومحافضة، ولديها من الخبرات ما يجعلها مرجعا جيدا عند الحاجة لرأي سديد.

عيسوى:

في منتصف الخمسينات، ضئيل الجسم، طيب جدا، يمتلك عمارة

بجي شعبي، لا يهتم بشيء قدر اهتمامه بابنته، طيب جدا لدرجة  
السداجة.

منصورة:

ابنة عيسوي، في بداية العشرينات، ذكية، طموحة، حاصلة على  
ليسانس آداب علم اجتماع، وتقوم بتحضير رسالة الماجستير، جريئة  
ومنطلقة، واثقة في نفسها، عملية جدا.

عرنوبي:

بلطجي في بداية الثلاثينات، ليس قوي البنية ولكنه قاسي القلب  
جاف المشاعر عديم الشفقة، وله أتباع يجعلون منه خطرا على أي  
منطقة، الجميع يخشونه ولذا فأوامره دائما مطاعة.

الطاروطي:

صديق عيسوي، في بداية الخمسينات، ممتلئ الجسم، ذكوري جدا  
وفظ، يمضي يومه بين القهوة ومحل الملابس الجاهزة الذي يمتلكه.

شابان وفتاة كانوا بالأمس القريب من أطفال الشوارع

رجل أربعيني متصابي

عسكري

عاملان

رجال عربويي

بائعين وبائعات وعمال وموظفين وشخصيات أخرى من مختلف  
الأعمار

# الفصل الأول

## المشهد الأول

يفتح الستار، المكان غارق في الظلام، الإضاءة تبدأ خافتة وتزداد تدريجياً، هناك عدد من أبواب المحلات الجرارة المتجاورة والمغلقة والتي تعلوها لافتات المحلات، المكان يغرق في الصمت، تبدأ الموسيقى مع دخول البائعين، كل بائع أو اثنين يتجهون لأحد الأبواب الجرارة ويقومون بفتحه مصدرا صوتا يتلائم مع إيقاع الموسيقى، خلف الأبواب توجد الفتارين الزجاجية التي يقف وراءها عدد من المانيكانات التقليدية المتنوعة، يبدوون في تلميع الفتارين

البائعون:

فتارين فتارين فتارين

وهندوم لبنات وبنين

قمصان

شورتات

فساتين

فتارين محتاجة تلميع

علشان نتشاف ونبيع

والرزق يحب

تشبّ

تَكْبُ

المئة على الفتارين

وتلمّع في الفتارين

البائعون ينتهون من عملية التلميع ويستديرون خلف الفتارين  
ويقومون بترتيب الملابس وتنسيقها على أجساد المانيكانات

البائعون:

ورا كل قزاز مانيكان

مانيكان ل woman أو man

واقفين

قاعدين

لابسين

حلوين

وتشوفه تقول إنسان

لا بيزهق ولا يتضايق

ومنتبّي بشكل يضايق

دلوعة ورايقة

طويلة وعايقة

يا ريتي ورا الفتارين

أرحم م النبي آدمين

ينهون العمل مع بداية ظهور الزبائن والمارة، يقف البائعون أمام  
المحلات وهم ينادون المارة ليشتروا، بائع 1 يكلم زبون 1 الذي ينظر  
للفاترينة

بائع 1:

قرب قرب

خدلك فكرة

زبون 1:

واشترى بكرة؟

بائع 1:

لأ.. بكرة أجازة

الزبون يبتعد

بائع 2 يكلم زبونة 1 التي يبدو عليها الجدية وترتدي نظارة طبية

بائع 2:

أهلاً أهلاً

عايزة يا أبله؟

زبونة 1:

يا ابني دي بدلة؟

بائع 2:

وماله يا أستاذة

الزبونة تشيح بيدها وتبتعد

بائعة 1 تكلم زبونة 2 وهي امرأة كبيرة في السن وبصحبتهما شاب

بائعة 1:

هاتي من ده لإينك

الزبونة بضيق

زبونة 2:

حاسي ملافظك

البيبي ده جوزي

تنصرف الزبونة وهي تسحب الشاب بقوة

بائعة 2 تكلم زبون 2 وهو شاب يسير مختالا بنفسه

بائعة 2:

فيه كل الألوان

الشاب يغازلها

الشاب:

وأنا عندي كمان

بس انتي تعوزي

البائعة تدفعه بعيدا بغضب

الزبائن ينصرفون تدريجيا بينما البائعون ينادون

البائعون:

بُصُّوا تعالوا

شوفوا يا جماله

لبس الراجل

لبس مراته

ولبس عياله

مالكم مالكم؟

إيه اللي جرالكم؟

ماله السوق كده

واقف حاله

يخرج الجميع ولا يبقى أحد سوى البائعين

البائعون:

لبسنا المانيكان

لمعنا الفتارين

وما بعناش بجنيه

ولا حتى بقرشين

يجلسون محبطين أمام محلاتهم، فجأة تدخل سيارة ربع نقل  
محملة بمانيكانات حديثة غريبة التصميم مظموسة الملامح والأطراف  
ومتعددة الألوان، وفي حوض السيارة بينها رجل يمسك مايكروفونا  
وينادي في البائعين

الرجل:

بشرى لكل محل مفليس

بيع مانيكانك واشتري أرخص

غَيَّرَ شَكْلَكَ

جَدَّدَ دَمَكَ

قَلَعَ

وَأَرَمِي

وَأَخَذَ دَه

وَأَلَيْسَ

يَمْشِي رَجَالِي

وَيَمْشِي حَرِيمِي

يَطْوُلُ

يَقْصُرُ

أَبْيَضُ

وَأَسْمَرُ

وَأَزْرَقُ وَأَخْضَرُ وَأَصْفَرُ وَأَحْمَرُ

لِيَهْ فِي الزَّمَنِ الْمَاضِي بِتَفْضُلٍ؟

وَأَنَا جَائِلُكَ جَائِبُ مُسْتَقْبَلِ

بِيعْ مَا نِيكَانُكَ وَاشْتَرِي أَجْمَلَ

يَلْتَفِ حَوْلَهُ الْبَائِعُونَ، يَنْزِلُونَ الْمَانِيكَانَاتِ بِسُرْعَةٍ

الْبَائِعُونَ:

هَاتِلِي تَمَانِيَةَ

عَايِزَ سَبْعَةَ

وَأَنَا سَتَاشِرُ

هاتلي انا تسعة

يُخرجون المانيكانات الأخرى من وراء الفتارين، يزعون عنها  
ملابسها ويلقونها في حوض السيارة الربيع نقل  
البائعون:

يلاف داهية

غوروا بعيد

وشكوا فقر

وما فيناش صبر

بعنا ب صفر

ف موسم عيد

تنصرف السيارة بينما يضعون المانيكانات الجديدة في الفتارين  
وقد ارتدت الملابس  
البائعون:

غيرنا شكلنا

جددنا دمننا

على الله نشوف كاشات

بضاعتنا اتجمعت

فتاريننا اتلمعت

بدلنا المانيكانات

على الله نشوف كاشات

تخفت الإضاءة تدريجيا بينما يغلقون الأبواب الجرارة  
ينصرفون، ثم يظلم المكان تماما  
إظلام



## المشهد الثاني

تفتح الإضاءة تدريجياً، إنه مخزن قمامة، المكان ممتلئ بالكراتين والأكياس والزجاجات البلاستيكية والإطارات، هناك مانيكانات تملأ المكان، يدخل عاملان من بين الجمهور ويصعدان لخشبة المسرح وكل منهما يحمل كل مانيكانا

عامل 1:

أنا حيلي اتهد خلاص .. ست ساعات عمّال اشيل في الأصنام دي

عامل 2:

آخر اتنين خلاص .. نرمهم جنب الباقيين ونسلم ورديتنا ونخلع

يضعان المانيكانان، عامل 1 ينظر للمانيكانات قليلا

عامل 1:

مش مرتاح

عامل 2 وهو يمسك ظهره

عامل 2:

ما هي وردية تتعب صحيح

عامل 1:

مش قصدي .. مش مرتاح إننا نسيب التماثيل دي عريانة جنب

بعضها كده .. مش اخلاق يعني

عامل 2:

(ساخرا) خلاص .. بيّت معاهم أنت راقب عليهم

عامل 1:

مش قصدي برضه

عامل 2: (يضحك) شكك خايف

عامل 1:

أه خايف (ينظر للمانيكان حريمي) خايف على نفسي م الفتنة

يسرع ليلتقط أوراق جرائد

عامل 1:

أنا أقولك .. احنا نغطيهم بالجرايد دي .. أهو لما حد يخش وعينه تقع عليهم ما نشيلش ذنبه

يلتفت لعامل 2 وهو يجمع الجرائد

عامل 1:

إيدك معايا

يساعده العامل متأففا

عامل 2:

الأمر لله .. ماشي يا سيدي

بينما يجمعان الجرائد ويغطون المانيكانات يجد عامل 2 كرتونة

يخرج منها شعاع أخضر ينعكس على وجهه

عامل 2:

إيه ده؟ البتاعة دي فيها ملوخية بتنور

عامل 1 وهو يغطي المانيكانات

عامل 1:

دي العيال اللي شغالين ناحية الجامعة لقيوها في الزبالة .. هي كده  
زبالة كلية علوم على طول .. تحسهم بيحضروا عفاريت

عامل 2 ينظر بقلق للمانيكانات ويضع الكرتونة بجوارهم

عامل 2:

بسم الله الرحمن الرحيم .. طب باقولك إيه .. يلا بينا يا عم .. مش  
ناقصة هي تلبيش جتت

عامل 1 وقد انتهى من عمله

عامل 1:

يلا .. خلينا نوَقْر شوية صحة عشان مش بعيد بكرة تلاقهم عايزينا  
ننقل التماثيل دي لحتة تانية

عامل 2 وهو يأخذه من يده ويتعد مسرعا

عامل 2:

لا ما فيش شغل لا بكره ولا بعده ولا بعده .. الراجل صاحب المخزن  
حماته ماتت وسافر

عامل 1:

سافر يدفنها ولا يعزي؟

عامل 2:

لا .. سافر يصيف .. حقه برضه .. دي ليلة بتحصل مرة واحدة في  
العمر .. واحنا أجازة لحد ما يرجع

عامل 1:

حلاوته ..

يخرجان مسرعين نازلين من على خشبة المسرح بين الجمهور  
ويخرجون من القاعة

المكان يقبع في الصمت قليلا، الإضاءة تتغير، يخرج دخان أخضر  
اللون من الكرتونة وينتشر بين المانيكانات، يختفي الدخان تدريجيا،  
أحد المانيكانات الرجالي (مونيكا) يبدأ في تحريك ذراعه ببطء شديد، ثم  
رقبته، ثم يأخذ نصف خطوة للأمام، حركته متخشبة قليلا في البداية،  
تبدأ حركاته في الازدياد وتصبح أكثر مرونة، يتجه نحو مانيكان حريمي  
(إليجانس) ويتأملها، يزغدها ببطء في كتفها

مونيكا:

إليجانس .. إليجانس

إليجانس تحرك رأسها ببطء ناظرة إليه

مونيكا:

إليجانس .. سامعاني؟

إليجانس تتأمله ببطء من أعلى للأسفل، تتسمر عيناها عليه  
قليلا، ثم تقفز فجأة في رعب

إليجانس:

إيه ده؟ مونيكا .. انت بتتكلم!! وبتتحرك!! و.. و.. ازي؟! انت كده  
ازاي؟

تصمت فجأة، تنظر ليديها اللتان تتحركان، تضحك في بلاهة

إليجانس:

هاهاها .. وأنا كمان

مونيكًا:

مش لوحدنا أكيد .. كل المانيكانات دي أكيد زينا .. ولا تفتكري أنا  
وانتي بس؟ ولا إيه؟

إليجانس:

(بزهو) لأ .. أكيد أنا بس .. إنت عارف إنني مميزة من زمان .. أنا عليا  
ضمان عشر سنين .. وانت تلاقيك اتعديت مني عشان كنت ساند عليا  
بقالك كتير بس .. تمن سنين تقريبا؟

صوت يأتي من الخلفية

صوت شون:

حرام عليك هاموت!!!

يتجهان لمصدر الصوت، إنه شون الجالس تحت ماركو

شون:

قولوله يشيل نفسه من عليا .. فخادي اتطبقت

ماركو:

معلش .. أصلي اول مرة أتحرك .. فتعبت .. هارَّح شهرين بس ولا  
حاجة وأقوم

مونيكًا يكلم إليجانس في سعادة

مونيكًا:

مش لوحدنا يا إئيجانس .. مش لوحدنا

## إليجانس في ضيق

إليجانس:

إيه يا مونيكا؟ مالك مزقط قوي كده .. احنا ف مشكلة مش في رحلة يعني

شون:

لوانتوا ف مشكلة أنا ف مصيبة سودا .. يا حج قوم أبوس بلاستيك صوابك

ماركو:

أنا فايبر جلاس مش بلاستيك على فكرة .. وعموما .. انا ما يشرفنيش أقعد على مانيكان معضمم زيك

إليجانس تقترب من ماركو بينما يساعد مونيكا شون على النهوض

إليجانس:

إيه ده؟ هما عملوا مانيكانات فايبر جلاس؟

ماركو:

من زمان .. الأمريكان دول عفاريت

يمد يده ليصافح إليجانس

ماركو:

ماركو .. من مصانع ماركو في واشنطن

إليجانس:

إليجانس .. من مصانع إليجانس في كوريا

شون يقف متعبا ويصافح مونيكا

شون:

Made in China .. انا شون ..

مونيكًا:

واضح .. وأنا مونيكًا .. لو عارف مصانع مونيكًا الكوري

فجأة يقترب مهم لورد مسرعا وهو يمسك بطرف جريدة من التي

تغطيه

لورد:

يا ولاد .. ما حدش شاف بقيت الجرنال ده!!

مونيكًا في ضيق

مونيكًا:

ولاد إيه يا كابتن؟ انت مين أصلا؟

لورد:

أنا لورد .. مصانع لورد اللي عملتني في التمانينات قفلت .. ما توعوش  
علمها انتوا .. كانت حاجة طلياني مفتخرة كده .. باقي الجرنال بقى الله  
يكرمكوا

شون يقترب منه

شون:

انت بتعرف تقرا؟

لورد:

لأ طبعا .. بس لقيت صور المحل اللي كنت موجود فيه هنا .. وعازب  
اشوف لوليه صور تانية .. عشان أعرف أوصله .. اسمه الجمعية

التعاونية للملابس التقليدية التابعة لوزارة التضامن الاجتماعي بالاشتراك  
مع التأمينات والمعاشات فرع حدايق القبة .. أنا كده متأخر بقالي أسبوع  
وده سلوك وظيفي سيء

شون:

هو احنا ازاي بقينا كده؟

صوت طفلة من خلفهم

صوت فيرا:

الإشعاع العضوي ثنائي النواة

يلتفتون لمصدر الصوت، إنها فيرا تمسك بالكارتونة التي كانت

تحوي المادة المشعة

فيرا:

في السبعينات كان فيه تجارب سرية في المعامل الروسية عشان  
يوصلوا لمادة لو اتحققت في الجسم تقدر تخلي الأنسجة تجدد نفسها  
بشكل لا نهائي .. طبعا التجربة فشلت .. بس واضح إن فيه ناس هنا لسه  
بيحاولوا يوصلوا لنفس التركيبة

ماركو يبنغزها في كتفها ببطء، تنظر له فيرا

ماركو:

انتي مين يا شاطرة؟

فيرا تنظر في كف يده

فيرا:

انت متصنِّع ف 2005؟

ماركو:

آه

فيراً:

أنا طنطك فيرا .. مصنع فيرا الروسي عملي في السبعينات .. كنت  
انت لسه شوية رملة ققط الشوارع بتحقرّ فيها وت ....

صوت يقاطعها

صوت ستار:

عيب كده .. ما يصحش

يلتفت الجميع لمصدر الصوت، إنها ستار، تسير وقد خبأت  
جسدها بأكياس بلاستيكية

ستار:

سوري اتأخرت على الاجتماع .. مع إني اول واحدة جيت المكان هنا ..  
بس كنت بادور على حاجة ألبسها .. ستار .. مش عارفة سمعتوا عن  
مصانع ستار الهندي ولا لأ .. متهيألي كده أنا اتعرفت عليكو كلكووا

تشير لواحد واحد من الموجودين

ستار:

شون .. ماركو .. لورد .. إlijانس .. فيرا .. مونيكاً

لورد:

على فكرة يا ابني .. اسم مونيكاً ده إسم حريمي عند البني آدمين

مونيكاً:

واحنا مالنا ومال البني آدمين؟

فيرا:

احنا تقريبا بقينا بني آدمين

إليجانس:

عظيم .. أنا كده ممكن أشتغل موديل واتشهر بجد واطلع في التلفزيون بدل عمري اللي ضاع في فاترينة محلات الكوتش ف عباس العقاد

مونيكا:

وماله الكوتش .. ما هو كان ساترنا بدل الأي كلام اللي احنا لايسينه

ده

لورد:

(بضيق) ما تقولش أي كلام .. دي جريدة قومية محترمة ..

ينظر للجرائد على جسم مونيكا

لورد:

أهو .. باقي الجرنال أهو

يطارد مونيكا محاولا الحصول على الجريدة من على جسمه بينما شون يجلس ويغبط بيده على رأسه

شون:

يا ميلة بختك يا شون .. ما كنت قاعد على حجر دبدوب متبّي في الشواري .. كان إيه رماك الرمية دي يا ضنايا .. ليه كده يا حاجة اعتدال تخلي بيا كده ليه؟

فيرا:

ضَعْفًا .. أصحاب المحلات دول رمونا .. وما دمننا خلاص بقينا بنتحرك  
وتتكلم بعد ما كنا زمان بنسمع ونشوف بس .. يبقى نروح نجيب عالمها  
واطمها ونرجع المحلات دي بالإكراه

ماركو:

الروس مش همهدوا غير لما يولعوا العالم .. بالراحة يا ماما ..  
بالسياسة والتخطيط .. أنا عشت في محل توكيل لماركة ما بيشتريش منها  
غير كريمة المجتمع واعرف أفكر كويس .. الحل إننا نرَّجِّح الأول سنتين  
ثلاثة وبعدين نشوف هنعمل إيه

فيرا:

انت أصهلك ما شفتش حاجة .. أنا من سنة سبعة وسبعين وأنا  
باتشحطط من محل ل محل .. لفيت بدل المحافظة عشرة .. م الفاترينة  
دي للفاترينة دي .. لحد ما اترميت في محل ب سبعة ونص في بولاق .. في  
الطلّ .. والعيال الصغيرة تشد في دراعي وتلطشني بالأقلام وت .. مش  
عايزة افتكر .. وبالليل اتحدف في سبت هدوم زي زي أي فردة شراب ..  
وأخرتها يبيعني الواطي ويشترى بدالي مانيكان بيتنفخ لونه بنفسجي!!

لورد ممسكا بالصفحة التي تغطي الجزء الأسفل من جسد مونيك  
ومونيك يصرخ

مونيك:

لأ .. الصفحة دي لأ!!

لورد:

ده هي دي اللي بادور عليها .. دي فيها صورتني أهو

إليجانس تصرخ

إليجانس:

بس!!

الجميع يلتفتون ناحيتها

إليجانس تنظر لهم ولا تجد ما تقوله، تلتفت لستار

إليجانس:

عندك حل؟

ستار:

أنا كل اللي أعرفه إني سمعتهم بيقولوا وهما بيدخلوني هنا إنهم  
هيودونا مصنع بيسجِّح الحاجات ويعيد تصنيعها .. يعني يعملوا مننا  
طفايات .. صناديق .. أطباق .. قُرَش بلاط .. كده يعني

مونيكًا:

أحنا لازم نخرج من هنا

شون:

هنخرج نروح فين؟

لورد:

الجمعية التعاونية للملابس التقليدية التابعة لوزارة التضامن  
الاجتماعي بالاشتراك مع التأمينات والمعاشات فرع حدائق القبة

مونيكًا:



ستار:

هايل .. احنا نلبس اللبس ده ونخرج

صوت فتح الباب

شون:

فيه حد دخل .. استخبوا بسرعة

يختبئون خلف أحد أكوام الكراتين والأكياس، يدخل العاملان

من بين الجمهور

عامل 1:

أسبوع أجازة .. حاجة لوز اللوز

عامل 2:

أنا بعد التريجة دي ممكن أفع بالخمس تماثيل على كتفي في

الشيلة الواحدة

ينظران للمكان مندهشين

عامل 1:

إيه ده .. فين الأصنام؟!

عامل 2:

ما هو يا حد جه خدهم .. يا ما حدش جه خدهم .

عامل 1:

ولو طلع ما حدش جه خدهم؟

عامل 2 يلتفت له بيطاء

عامل 2:

يبقى هما خدوا بعضهم ومشىوا

ينظران لبعض في خوف، يبدأ جسديهما في الارتعاش

عامل 1:

أنا رأي نروح نصلي الظهر جماعة

عامل 2:

الله يفتح عليك

يخرجان مسرعين من بين الجمهور

لحظات ويخرج المانيكانات من وراء أكوام الكراتين وقد ارتدوا

الملابس، الجميع يخرج ما عدا ماركو

مونيكاً:

حلو.. سابوا الباب مفتوح.. يلا بينا

ستار:

استنى يا مونيكاً.. فين ماركو؟

مونيكاً ينادي

مونيكاً:

ماركو.. ماركو.. انت فين يا عم انت؟!!

يخرج ماركو وقد ارتدى ملابس ضيقة عليه جدا

ماركو:

أنا هاخرج كده ازاي؟

شون:

الهدوم ضيقة فعلا

ماركو:

مش الفكرة .. المشكلة في الشبشب .. هامشي بشبشب!!

إليجانس تكلمه مشيرة ل فيرا

إليجانس:

انت هتمشي ولا اطلق عليك البت أم ناب أزرق دي؟

ماركو:

لا خلاص خلاص .. يلا بينا

لورد يهمس ل فيرا

لورد:

فيرا .. ما تبجي معايا نروح الجمعية التعاونية للملابس التقليدية التابعة لوزارة التضامن الاجتماعي بالاشتراك مع التأمينات والمعاشات فرع حدائق القبة وأنا أخليكي تقفي معايا في الفاترينة هناك

فيرا:

الراجل ده يتكتف يا مونيكا عشان شكله هيصدقنا كثير

مونيكا يقترب من لورد فيضع لورد يده على فمه

ينظر الجميع ناحية الجمهور ثم ينزلون للصالة متجهين للخروج من القاعة من بين الجمهور مع إظلام المسرح بمجرد نزولهم

إظلام

## المشهد الثالث

تفتح الإضاءة تدريجيا، إنها حديقة عامة، الجميع جالسون  
مستنديين بظهورهم لشجرة ضخمة

لحظات من الصمت، ثم يتململ لورد في جلسته

لورد:

مش هينفع كده على فكرة .. احنا قاعدين كده من الصبح .. الدنيا  
لَيْت خلاص .. والكلاب هنا كتير وأنا مش متعود على الاحتكاك بمخلوقات  
زي دي

شون:

يا عم لورد .. الكلاب دي مخلوقات أليفة جدا .. ما أذيتناش ..  
بالعكس .. تيجي تشمشم فينا .. تلاقي جلدنا ناشف .. ترش علينا شوية  
مياة وتمشي

فيرا:

إنت فاكر دي مية يا اسطى؟

يقف مونيكا في ضيق

مونيكا:

أنا كمان زهقت .. احنا قاعدين ما بنعملش حاجة ولا بنفكر نعمل  
حاجة

ستار:

احنا لو مش هنقدر نرجع للفنارين دلوقتي .. فاحنا محتاجين ع  
الأقل مكان نستخى فيه .. نأجر شقة مثلا

لورد:

ودي نجيب فلوسها مين؟ احنا مفلسين .. ولو ممكن نبيع حاجات ..  
هنبيع نفسنا كمانيكانات

ينتبه لما قاله

لورد:

إيه ده؟ أنا بقيت باقول شعرزي الأستاذ عبد الباسط بتاع  
الحسابات في الجمعية التعاونية لل ...

إليجانس تقاطعه

إليجانس:

اسكت خالص .. انتوا عارفين إنه احتمال نرجع تاني مانيكانات  
واحنا مرميين هنا .. متخيلين ساعتها ممكن يحصل فينا إيه؟

يظهر ثلاثة من المتسولين، شابين وشابة، ينظرون للمجموعة ثم  
يتقدم أحدهم ببطء مخرجاً موساً من فمه، ماركو يرتجف خوفاً

ماركو:

مش محتاجين نتخيل .. هنعرف حالا

بمجرد ظهورهم تتسلق فيرا الشجرة وتختفي بين أغصانها

فيرا:

هابقى ألم أنا اللي هيفضل منكوا وابعه خردة

شاب 2 ينظر لإليجانس

شاب 2:

جاية ع السريع الدوغري ولا بايته للضلمة وخري؟

إليجانس:

باعرف عربي بس والله .. أنا أسفة

شاب 1 يقترب من ستار

شاب 1:

الكلام على إيه؟

ستار:

الكلام على ورق الجرايد تقريبا .. حسب اللي شفته يعني

الشاية تقترب منها وهي تفتح مطواة

الشاية:

ده هزار وخفة دم وحلويات

مونيك يتصدى لهم قاطعًا الطريق بينهم وبين ستار ومونيك

مونيك:

مكانك انت وهي .. احنا عضمنا ناشف على فكرة

لورد:

من معرفتي بيه أقدر أقولك إنه ما بيكذبش .. بتاتا

شون:

اتكلموا عن نفسكوا يا جدعان .. أنا حوضي اتطبق من ساعة قعدة

ماركو عليا ولسه ما فكش

الشاب الثاني بتهديد

شاب 2:

قصر الكلام .. الجنيينة دي تبعنا .. مشوا رجليكوا بقى بدل ما

تخرجوا على ركبكوا

يقول كلمته الأخيرة مخرجاً سيفاً من ظهره، شون يتأمل السيف  
شون:

لوفيه حد معاكوا لسه وشايل دبابة ف جيبه يا ريت يشرفنا ..  
عشان ده اللي هينجز  
مونيكاً يدفع شاب 1 في صدره، ترتطم رأسه بالشجرة ويسقط  
مغشياً عليه

الشابة:

بتمد إيدك على خطيبي قدامي أنا وجوزي!!

ماركو:

حضرتك هو اللي اتخبط ف دماغه مش انتي

شاب 2 يجري بالسيف تجاه مونيكاً

شاب 2:

ده دماغتكو هي اللي هتطير واحد واحد

يهوي بالسيف على رأس مونيكاً فيمد مونيكاً يده ويمسك  
بالسيف، يبدو الذهول على وجه شاب 2 والفتاة

إليجانس:

جدع يا مونيكاً .. ججع

مونيكاً ينزل بالسيف والشاب يحاول المقاومة دون فائدة

شاب 2:

كل ده واسمك مونيكاً؟ انجديني يا بت

ستار تجري للخارج

ستار:

أنا هاجري أشوف حد ينجدنا احنا كمان  
مونيكاً يلتفت لها

مونيكاً:

استني يا ستار!!

لا تستمع له وتخرج، يلتفت للشابة التي تقترب منه ببطء ثم  
تغرس المطواة في جنب مونيكاً، ينظر لها مونيكاً بهرود وينتزع المطواة،  
ثم يخأص السيف من يد شاب 2 الذي يخر أمامه جالساً على ركبتيه

شاب 2:

اعذرنى يا زميلي .. أنا محقوقك .. انت مين يا جدع انت؟

الشابة تقترب منه وتداعب خصلات شعره

الشابة:

ولو انك شكلك فرفور .. بس عجبتني .. تقرا فاتحتي؟

يدفعها مونيكاً بقوة فتنزل على ركها بجوار شاب 2

ماركو يقترب منهما بثقة

ماركو:

احنا جامدين قوي .. واللى يفكر بس إنه يبصلنا ...

أثناء كلامه يكون شاب 1 قد أفاق، يراه ماركو فيتراجع محتمياً

بمونيكاً

ماركو:

الأستاذ مونيكاً مش هيديله فرصة!!

لورد يقترب من شاب 1 ويكلمه بهدوء واضعاً يده على كتفه

لورد:

بص يا كابتن .. وضعكوا سيء جدا .. واحنا مش في غابة .. فيلاش  
تتغابى .. وامشوا من هنا بالذوق .. بدل ما نرميكوا فوق  
الشاب لا يفهم شيئا

شاب 1:

أنا مش فاهم حاجة

لورد:

أصلي اكتشفت إنني باحب أكتب شعر

شاب 2 يصرخ في شاب 1

شاب 2:

انزل على ركبك قدام الباشا .. ده السلاح ب  
يرمشش يا جدع  
يرمشق ف جتته ما

شاب 1 يجلس خائفا بجوار الاثنين الآخرين

إليجانس تقرب من مونيكا

إليجانس:

احنا ممكن دلوقتي نخلص علمهم وناخد منهم الفلوس اللي  
محتاجينها ..

مونيكا ينظر لهم وهو يفكر

تطل فيرا برأسها من الأعلى

فيرا:

فعلا .. الحرب خدعة .. والجون ممكن يعي ف آخر ثانية

تنزل بسرعة

فيرا:

ميه ميه يا شقيق .. ثبّتهم ولا المسامير الشيش ف لوح الأبالكاش  
شون وماركو يقتربان من مونيكيا

شون:

مستني إيه؟ اعمل زي ما إليجانس قالتلك

ماركو:

طب هات الأسلحة دي وأنا هاعملها  
لورد ناظرا لماركو ساخرا ضامًا ركبتيه

لورد:

ما انت كنت هتعملها فعلا من شوية

فيرا:

أنا رأيي نقلبهم ف القرشين اللي معاهم ونسرّحهم في الإشارات ..  
يلمولنا الغلّة كل يوم ونديهم نفحة

شون:

انتي كنتي ف محل ولا ف غرزة؟

شاب 2 بضيق

شاب 2:

يا جدعان .. هتتسايروا كثير؟ يا تخلّصوا علينا يا تخلّصونا

مونیکا:

امشوا من هنا .. ما نشوفش وشكوا تاني .. دورولكوا على مكان تاني  
فيرا تهمس له

فيرا:

مُكَّنة

مونیکا:

مُكَّنة تاني

فيرا:

تانية .. مُكَّنة تانية

مونیکا:

أي نيلة .. فاهمين؟! يلا

ياخذ نصف خطوة بانجاههم فيجرون في رعب خارجين

إليجانس في ضيق

إليجانس:

انت بتستعبط يا مونیکا؟ دي فرصة تضيعها؟

مونیکا:

لأ يا إليجانس .. مش هنبدأها كده

ماركو:

احنا كده هننهما قبل ما تبدأ

يظهر رجل في الأربعينات، ينظر لإليجانس

الرجل:

لا حول ولا قوة إلا بالله

يقترّب منها بينما الجميع يتابعونه

الرجل:

إيه يا بنتي؟ إيه اللي عامل فيكي كده بس؟ شكلك بنت ناس .. إيه  
اللي ليك ع الحَوْش دول؟

مونيكاهم بالهجوم عليه ولكن شون يمنعه

شون:

استنى يا مونيكاهم .. الراجل شكله مش مؤذي خالص

مونيكاهم:

ده بيغلط فينا يا شون!! بيقول حَوْش

ماركو يلتفت لفيراهم

ماركو:

يعني إيه حَوْش يا طنط؟

فيراهم:

يعني هُبُؤَات وَخُبُؤَات وَكُتْيَانِين

لورد:

مش شتيمه يعني .. دي مصطلحات علمية باين

الرجل يكلم إيليجانس بحنان

الرجل:

انتى تعرفهم يا بنتي؟

إليجانس:

الظروف بس هي اللي خلتنا سوا

الرجل:

ظروف منيلة بنيلة

إليجانس:

مش بنيلة واحدة حضرتك

الرجل يخرج نقودا من جيبه

الرجل:

خدي يا بنتي .. انتي صعبتني عليا والله

إليجانس تنظر للنقود بفرحة

إليجانس:

متشكرة جدا حضرتك

الرجل:

ما بلاش حضرتك دي .. انتي اسمك إيه؟

إليجانس:

إليجانس

الرجل:

يا سلاااام .. إسم نادر .. وبراق .. ومتميز .. أنا برضه اسمي كده ..  
وممكن تندهييني بيه من غير حضرتك

إليجانس:

اسمك إيه؟

الرجل:

الدمهوري عجلان أبو دِكَّة

إليجانس:

متهياي حضرتك هتبقى أسهل بالنسبالي

الرجل وهو يضع ذراعه على كتفها

الرجل:

مش هنختلف .. كلها يومين وهتاخدي عليا .. والبيت هيعجبك

إليجانس وهي تبعد ذراع الرجل وتبتعد في توتر

إليجانس:

بيت إيه؟

الرجل:

بيتي

إليجانس:

وأنا إيه اللي هيوديني البيت عندك؟!

الرجل يقترب منها وهو يتفرس جسدها

الرجل:

مش أحسنك من قعدة الشارع .. وأهو لما تبقي ف حضن راجل

أحسن ما تبقي في أحضان الضياع

شون في ضيق

شون:

لا .. سيمهولي أنا بقى

شون يجري تجاه الرجل

شون:

سيبها ف حالها يا بني آدم انت!!

الرجل ينظر له باحتقار

الرجل:

لا يا حبيبي ما ليش في الكلام ده

شون وهو يمسكه من ياقة قميصه

شون:

ولا احنا لينا فيه برضه .. امشي شوفلك مَكْنَة ثانية

فيرا:

الله يخرب بيتك .. هتثبّت التهمة عليها .. اسمها مَكْنَة .. مَكْنَة!! ومكانها

هنا في الجملة غلط أصلا!!

الرجل بعدائية

الرجل:

وله .. امشي بعيد بدل ما امد ايدي ع....

يقطع حديثه صوت قادم من الخارج

الصوت:

بتعمل إيه انت وهو عندك؟

الرجل يتوتر، يأخذ النقود من يد إيجانس بسرعة ويخرج

الرجل:

عبيطة .. خليكي في الهم اللي انتي فيه .. أنا هاروح اصطاد من تحت

الكوبري أضمن

إيجانس في حسرة

إيجانس:

كلهم طمعانين في بلاستيكي!!  
بمجرد خروجه يظهر عسكري ويتجه نحوهم

العسكري:

بطاقتك يا هوملس منك له  
ماركو في غيظ

ماركو:

لا.. ما اسمك لكش!!

العسكري:

ما تسمعش لمن يا طفل الشوارع يا منتفخ انت؟  
يتجه ماركو نحو العسكري بينما لورد يأخذ الأسلحة من يد  
مونيكا ويلقها بعيدا

ماركو:

احنا لا هوملس.. ولا أطفال شوارع.. واعرف انت بتكلم مين قبل ما  
تتهور وبعدين تتقوّر

فيرا:

باقولكوا إيه.. قولوا الكلام اللي انتوا عارفينه.. بلاش فزلكة والنبي..  
اسمها تتقوّر يا اسطى

العسكري في غيظ

العسكري:

انت بتغلط في الحكومة؟ تطلع مين يعني ولا مين يعني؟ ولا انت مين  
يعني؟

مونيكًا:

هو عادي البني آدمين بيكرروا نفس الجملة بنفس المعنى كده؟

لورد:

أه .. عشان التأكيد .. بلاغة شعبية

ماركو وهو يقلب في جيوبه

ماركو:

أنا مواطن أمريكي .. ومن حقي أعمل اللي أنا عايزه في أي مكان طالما  
ما باخالفش القانون

يخرج ورقة من جيبيه ويناولها للعسكري الذي يقرأها

العسكري:

أهلا وسهلا .. الأستاذ تي شيرت ينك .. من ولاية إكس إكس لارج؟

ماركو:

أه .. تبع مركز لوس أنجلوس

العسكري يعيد له الورقة

العسكري:

يا مرحب يا مرحب .. أنا ابن خالتي عندكوا برضه .. ف إيطاليا  
شون غير مستوعب

شون:

أنا عايز ارجع القفص القزاز بتاعي .. كده كثير!!!

العسكري:

وايه بقى اللي ممشيكوا في الشوارع مهديلين كده؟

ماركو:

دي حفلة تنكرية .. ومروحين دلوقتي نركب عربياتنا الغالية ونلبس  
هدومنا الغالية ونحط بارفاناتنا الغالية في بيوتنا الغالية

إليجانس:

يا جدعان .. الموضوع تحسوا إن فيه عقدة نقص أكثر منها فشخرة ..  
صح؟

العسكري وهو ينصرف

العسكري:

حفلة سعيدة يا باشا .. حفلة سعيدة .. ونورتوا مصر

يجتمعون سويا .. لورد بحزم

لورد:

كده مش هنخلص .. احنا لازم ندور على مكان يلّمنا فعلا وبيعدنا  
عن التدايعات العشوائية دي

فيرا:

احنا ما عاناش فلوس .. ولو جينا فلوس ما عاناش بطايق .. ولو  
ضربنا بطايق مش هينفع نقعد كلنا ف مكان واحد .. هي متقيلة زي  
الضومنة شامي ومغربي

شون:

صح .. احنا ما نعرفش نبقى حاجة غير مانيكانات .. ولازم حد يحطنا  
ف مكان .. يا إما مش هيبقالنا مكان .. زي ما بيحصلنا دلوقتي

إليجانس:

أكيد فيه حل .. فگريا ماركو

ماركو:

أنا كفاية اللي عملته مع العسكري .. ده مجهود عقلي حاسس إني  
خسيت بسببه .. استلم أنت يا مونيكا  
مونيكا:

شون معاه حق .. احنا ما ينفعش نكون غير مانيكانات .. وده اللي  
هتعملوه  
إليجانس:

هنعمله؟ وانت مش معانا ولا إيه؟  
مونيكا:

معاكوا طبعا .. هافهمكوا بعدين .. فيرا .. قوليلي .. نلاقي شقق صغيرة  
ورخيصة فين؟  
فيرا:

أقولك فين وما تزعلش؟

الجميع يصمتون

فيرا:

أنا باتكلم بجد .. أرخص حاجة ممكن تلاقها هي مكان تحت الأرض ..  
بيسموه بدروم .. لو عرفتوا تلاقوه أصلا مش هتستحملوا  
لورد:

احنا كنا مرميين في الزبالة واستحملنا واستطعنا الخروج .. وأي شيء  
يهون في سبيل العودة للجمعية التعاونية .....

مونيكا يمسه بعنف

مونيكا:

لو نطقت البتاعة دي تاني أنا هاوديك الجمعية الاستهلاكية للأدوات  
البلاستيكية

شون:

نستحمل يا جماعة وخلص .. احنا كلنا على بعضنا سبعة يعني  
إليجانس تنفت ناظرة للموجودين

إليجانس:

هو أنا ما باعرفش اعدّ ولا إيه؟ مش احنا ستّة بس؟

مونيكا:

ستار .. ستار فين؟

ماركو:

مشيت بدري بدري .. انت ناسي؟ ما حضرشش معانا ولا فقرة في

السيرك اللي حصل ده

مونيكا:

مش هنتحرك غير لما ستار ترجع

تدخل ستار فجأة وشعرها منكوش وهي تعرج

ستار:

آآه .. آآآه!!!

ترتمي على الأرض

فيراً:

طب هي رجعت أهو .. وشكلنا برضه مش هنتحرك

شون ومونيكا يجريان ناحيتها

شون:

ستار .. مالك؟ إيه اللي حصل؟

ستار يا عيياء

ستار:

جريت أدور على حد أقوله يلحقنا .. فجأة لقيت ف وشي المحل اللي

كنت فيه .. شفت الفاترينة قدامي .. ما صدقتش عيني .. لقيت رجليا

بتاخدني للمحل .. بصولي مستغربين من شكلي ولبسي .. سألوني رايحة

فين؟ بس أنا ما رديتش .. فضلت ماشية ناحية الفاترينة .. وقفت جنب  
المانيكانات الجديدة .. حسيت إني ارتحت أخيرا .. ما فيش دقيقة ولقيت  
البنات اللي في المحل بيشدوني من شعري ويرموني برة .. وفاء وحنان  
وسمر .. اللي أنا عارفة كل كبيرة وصغيرة ف حياتهم .. كان نفسي أخذهم  
بالحضن .. كانوا واحشيني .. بس ما عرفونيش .. أنا اتكسرت .. يا شون ..  
اتكسرت

لورد بجديفة

لورد:

طب هحتاج نجيب أنبوية أمير عشان نلزلقها اللي اتكسرت بقى  
إليجانس ساخرة

إليجانس:

كهن مانيكانات حريمي صحيح  
فيرا تساعد ستار على الهوض

فيرا:

بصي يا حبيبتى .. انتي صعبانة عليا طبعا .. بس اللي انتي شفتيه ف  
نص ساعة ده أنا عشته خمستاشر سنة ع الأقل عرض متواصل .. أصلا  
ده دراع مانيكان تاني .. ما كانش فاضل منها غير الدراع يا عيني  
مونيككا يعيل شعر ستار ويربت على كتفها  
مونيككا:

معلش يا ستار .. كله هيخلص

يتكلم بحزم

مونيككا:

كده خلصت يا جدعان .. تسمعوني كويس .. وتنفذوا اللي هاقلوه  
بالحرف

إظلام

## الفصل الثاني

### المشهد الأول

غرفة في بدروم، الحوائط بها شروخ، والمكان يبدو قديما وبه أثاث مهالك، وهناك شباك وحيد يطل على الخارج، وستارة خلفها حوض مياه، إنه الحمام، وسرير واحد، وبابور جاز، وشباك جانبي صغير، الجميع موجودون ما عدا مونيكا وفيرا، يتجولون في المكان ويعاينون الأثاث

ماركو:

أي كلام .. أي كلام .. كأننا ساكنين في جزمة!!

لورد وهو يعيدّل من لوحة لمنظر طبيعي على الحائط

لورد:

كويس إننا لقينا حطة تناوينا .. فكرة الواد مونيكا دي عبقرية

اللوحة تسقط من على الحائط

شون وهو يقف أمام الكنية القديمة

شون:

بس ما تنكرش إنه استوحى الفكرة مني أصلا .. الصين هتحكم

العالم صدقوني

يجلس بقوة فيتصاعد الغبار من الكنية

إليجانس تتحسس السرير

إليجانس:

فكرة عادية جدا .. ما قمهاش إبداع .. زي المكان اللي احنا فيه ده ..  
زيرو كريتيفي

تجلس ببطء على السرير بينما تقترب منها ستار  
ستار:

هو انتي ليه دائما مش عاجبك اللي مونيكا بيعمله؟ على فكرة هو  
بيحاول يساعدنا

تجلس بجوارها على السرير  
ستار:

كفاية اللي عمله معايا مثلا .. ده ...  
فجأة ينهار السرير بهما، تقفان وتنظفان ملابسهما من الغبار  
إليجانس:

كفاية فعلا .. كفاية قوي  
شون يتصنّت

شون:

جاين جاين .. اثبتوا  
الجميع يقفون في أماكنهم كأنهم مانيكانات، يدخل مونيكا وهو  
يحمل فيرا وكأنها مانيكان ويضعها أرضا بجوارهم  
مونيكا:

ده آخر واحد .. شكرا يا حج .. عيسوي  
يلتفت وراءه فلا يجد أحدا

مونيكا:

حج عيسوي .. يا حج  
يدخل رجل عجوز، إنه عيسوي صاحب الشقة

عيسوي:

لا مؤاخذة يا حكمت يا ابني .. أصلي ما نزلتس من فترة .. فنسيت إن فيه سلمة مكسورة وكنت هاتكعبل فيها

مونيكاً:

عارفها .. اتكعبلت فيها ست مرات

عيسوي:

هأبقى اصلحهاالك ما تقلقش .. أصلك الأوضة دي ما حدش دخلها من يجي ست سبع تمن تسع عشر سنين

مونيكاً:

انت مش فاكرولا ما بتعرفش تعد بعد خمسة؟

عيسوي ينظر للمكان

عيسوي:

أنا حتى مش فاكراًخر مرة سبته كان شكله عامل ازاي .. معلش بقى .. هتتعب شوية ف نضافته ..

مونيكاً:

سهلة

عيسوي:

وما تقلقش من الفيضان ...

مونيكاً:

تمام

عيسوي:

العرس بتاكلهم أول بأول

مونيكاً:

أهلاً

عيسوي:

ما تخافش .. العرس موضوعها اتحل

مونيكًا:

بالسرعة دي؟

عيسوي:

آه .. التعابين قايمة بالواجب ويتخلص عليهم

مونيكًا:

هايل .. بإذن الله على وشي هتخلصوا م التعابين

عيسوي:

تفتكر؟

مونيكًا:

أمال .. التماسيح هتظهر أكيد .. ما تقلقش

عيسوي:

ربنا يسهل .. تصدق أنا ارتحك لله ف لله كده يا حكمت .. بإذن

واحد أحد هتبيع المانيكانوات دي كلها

مونيكًا:

ادعيلي يا حج

عيسوي:

يا رب .. بس اهم حاجة تلحق تطلع بطاقة بدل اللي ضاعت منك ..  
مش عشاني أنا .. أنا قلبي دليلي واتطمنتلك .. عشانك انت .. لو كمين  
وقفك ولا حاجة ما تلاقيش نفسك في الحجز .. والحجز يعني سجن ..  
والسجن يعني اربع حيطان يجبسوا الروح يا ابني .. حاجة كده زي الأوضة  
دي .. بس أنيل

مونيكاً:

ربنا يطمئنك يا حج

عيسوي:

يلا .. أسيبك بقى يا حكمت ترَّج شوية .. سلامو عليكو

يخرج عيسوي، تتحرك المانيكانات

لورد:

حكمت؟! حكمت؟! انت عبيط؟! ما هو اسم حريمي برضه

مونيكاً:

أهو اللي جه ف بائي بقى

فيرا بضيق

فيرا:

وله .. لما تشيل بعد كده ما تبقاش تقرص ع الكتف .. الدراع ده

متلصِّم!!

ماركو:

أنا مش متخيل إني هاعيش هنا .. أنا أكرمي أخش المفرمة ويعملوني

ولاعات

شون:

مش أحسن من رميتنا في الشارع .. لو حد كان عرف إننا مانيكانات

كانوا عملونا تماثيل نشان في الموالد

إليجانس:

إيه الخيال الغريب ده؟ وبعدين إنتوا بتتكلموا ف إيه؟ احنا لا ينفع

نقعد في الشارع ولا نقعد هنا

ستار:

أيوه .. احنا لازم نرجع الفطارين

إليجانس:

إرجعوا انتوا .. أنا عايزة أفضل بني آدمة .. أنا الشهرة مستنياني  
يطرق الباب، يتسمرون مكانهم ومعهم مونيكا

صوت عيسوي:

حكمت .. يا حكمت

فيرا تلكز مونيكا

فيرا:

إنت هتسهبيل .. روح شوف مين

مونيكا يخبط جبهته

مونيكا:

نسيت

يتجه ليفتح الباب، يدخل عيسوي ومعه شابه في العشرينات. إنها

منصورة أبنته

عيسوي:

خشي يا منصوره .. عدم اللامؤاخذه يا حكمت يا ابني .. أصلك أول  
ما طلعت لقيت منصوره بنتي راجعة م الجامعة .. باحكيها عليك فقالتلي  
عندها فكرة مش بطالة للمانكانوات بتاعتك

منصورة تصافح مونيكا

منصورة:

أهلا .. منصوره العيسوي

عيسوي:

منصورة معاها ليسانسة آداب علم اجماعيات ويتحضر الماجيستيرة

مونيكا يصافحها

مونیکا:

حكمت .. حكمت حكمت .. اقتصاد منزلي قسم أزياء  
منصورة تنظر للمانيكانات

منصورة:

هممم .. بتشتغل في المانيكانات عن حب يعني .. جميل .. بص .. بابا  
ليه واحد صاحبه اسمه الطاروطي .. عنده محل هدوم صغير كده ..  
هنكلمه ببص ع المانيكانات دي .. ولو عجبوه يشيل .. تمام؟  
مونیکا ينظر للمانيكانات ولا يعرف بماذا يجيب، يلتفت لعیسوی  
ومنصورة ثم ينظر للباب خلفهما

مونیکا:

إيه ده؟

يلتفتان خلفهما بينما يلتفت مونیکا بسرعة للمانيكانات وهم  
يشيرون له بالنفي، ينظر له عیسوی ومنصورة فتتسمر المانيكانات  
مونیکا:

كان فار تقريبا ف بق عرسة بتجري بيه ووراها تعبان .. مش مهم

عیسوی:

ها .. قلت إيه؟

مونیکا:

أكید طبعا .. بس المهم السعر

عیسوی:

خلاص .. هاكلمه واردّ عليك

منصورة:

معلش بقى .. أزعجناك ..

مونیکا:

لا لا .. ولا يهمك

منصورة:

اتفديت ولا أعملك غدا معانا؟

مونیکا ينظر للمانيكانات ولا يعرف بماذا يجيب، يلتفت لعیسوی  
ومنصورة ثم ينظر للباب خلفهما

مونیکا:

إیه ده؟

يلتفتان خلفهما بينما يلتفت مونیکا بسرعة للمانيكانات وهم  
يشيرون له بالإيجاب، ينظر له عیسوی ومنصورة فتتسمر المانيكانات  
مونیکا:

المراي كان التعبان هو اللي بيجري وف بقه عرسة والفار بيرقص  
وراهم .. ما علينا  
عیسوی:

هتتعود عليهم مع الوقت .. ها .. هتاكل؟

مونیکا:

لا متشكر .. هاستنى بقى تقولي عملت إيه في موضوع الطربوطي  
عیسوی:

الطبااروطي

منصورة:

يلا يا بابا نسيبه يستريح

ينصرفان بينما منصورة تلقي نظرة طويلة لمونیکا، يخرجان  
ومونیکا يتابعهما بنظراته ولا يغلق الباب

شون:

ممکن تقفل الباب عشان احنا ما بنتكشفش على أغراب؟  
ينتبه مونیکا ويغلق الباب سريعاً  
إليجانس في ضيق

إليجانس:

بتاخذ أم رأينا ليه لما انت مش هتسمع الكلام؟ طرأبوطي مين ده  
اللي هيشترينا؟ انت عايزنا نقف في فاترينة ف حارة .. متخيل انت الناس  
اللي سي عيسوي ده يعرفهم شكلهم عدل يعني  
مونیکا:

مش أحسن ما نفضل كده لا طايلين بني آدمين ولا مانيكانات ..  
وبعدين إنتوا شفتوني بعثكوا فعلاً؟  
ماركو:

طب والأكل .. مش انا هزيتلك راسي وكتفي وكرشي وقصبة رجلي؟  
قلتلم لآليه؟  
مونیکا:

هنعمل إيه بالأكل .. هو احنا بناكل؟

لورد:

هننطقحه للفيران والعرس والتعابين .. يشبعوا بدل ما يفضلوا  
جعانين .. ونلاقهم علينا هاجمين ..  
يلتفت لمن حوله

لورد:

لما تلاقوني باتكلم كده تقطعونني على طول عشان الشعر اللا إرداي  
اللي بادلده ده  
ستار بجديّة

ستار:

احنا دلوقتي مستعجلين جدا .. اهدوا بس .. بصوا .. وجودنا هنا لا  
هو حل نهائي ولا هو حل من أساسه .. دي مجرد خطوة .. المفروض نلاقي  
طريقة نتسحب بها للفتارين اللي أترميننا براها ونرجعها تاني  
فيرا:

انتي ما حرمتيش يا بنتي .. المرة الجاية هترجعيلنا شايلة دماغك  
تحت باطك .. ده لو سابوا ذراعك واصل فيكي يعني  
مونيكًا:

أستني يا فيرا .. كملي يا ستار

ستار:

احنا محتاجين ندور على شغل .. لإننا محتاجين فلوس .. ولأزم نخرج  
للحياة .. هنفهم البني آدمين أكثر .. وهنتقدر نلاقي طريقة  
شون يصفق

شون:

إيه العظمة دي .. البت دي لازم تمسك نقابة المانيكانات بعد كده ..  
بس تصدقي فيه ثغرة صغيرة قد كده هو .. صغيرة لدرجة إنه ماركو ممكن  
يعدي منها

ماركو:

لا .. أنا كده مهتم اعرف

شون:

هنخرج من هنا ازاى؟ الناس شافونا بنخش مانيكانات .. هنطلع على  
رجلينا عادي كده؟ (يتظاهر بتحيةة أحدهم) مساء الخير يا معلم .. (يقلد  
الرد) اتفضل يا برنس .. ابن حلال قوي المانيكان ده

ستار:

لأ .. احنا هنخرج الفجر والناس كلها نايمة .. ومونيكا هيخرج معنا ..  
وكإنه خدنا يسرح بينا

إليجانس:

انتي اللي بتسرحي بينا على فكرة

ستار:

اسمعوني بس .. هنرجع بالليل متأخر .. ولا من شاف ولا من جري

فير:

أنا زهقت بقى أصحلكوا ف كلام .. بصي يا أبله .. أنا مش مختلفة  
معاكي .. بس اللي بتقوليه ده لازم عشان يتعمل صح .. نتفرق ونرجع  
نتقابل .. مش هنفضل ماشيين لازقين ف بعض كده

مونيكا ينظر للموجودين

مونيكا:

الكلام ده مش بطال خالص .. بس احنا الأول محتاجين نشوف  
موضوع الطاروطي ده .. ويمكن تبقى دي البداية .. جاهزين؟

ينظرون لبعضهم البعض

الجميع:

جاهزين

لورد:

أو ممكن نروح سوا للجمعية التعاونية لل....

يرجمون جميعا عليه

إظلام

## المشهد الثاني

تفتح الإضاءة على الحي الشعبي، هناك قهوة وبائع خضار وفكهاني  
وجزار ويبدو باب عمارة عيسوي والشباك الموجود في البدروم، الشباك  
مفتوح ورؤوس الجميع ما عدا مونيكا وفيرا تطل منه

ماركو:

مكان بيئة جدا

ستار:

لأ .. مكان شعبي عادي

إليجانس:

صح .. ستار معاها حق يا ماركو .. اسمها مكان شعبي بيئة

شون:

أنا كنت عارف إن آخرتنا هنترمي تحت الأرض مدفونين بالحيا كده

لورد:

انت مش حاسس بأي حاجة غريبة وانت بتقول "بالحيا" دي؟ انت  
من أسبوع كنت عروسة بلاستيك

صوت فيرا:

حد يشيلني اتفرج!! ولا أفك فخاذكوا من احواضكوا؟

شون:

وعلى إيه الأذى بس؟ تعالي تعالي

يحملها لتنظر معهم

فيرا:

لأ .. كده كفاية .. أشكرك

ينزلها، إlijانس تهمس لستار

إlijانس:

الواد مونيكاح راح فين؟ مش المفروض عيسوي واخده يقعد معاه ع  
القهوة يقابلوا الطرنبوطي ده؟

ستار:

تقريباً قابلوا منصوره بنت عيسوي ع السلم وواقفين يتكلموا شوية

إlijانس:

البت دي أنا خايضة ع الواد مونيكاح منها لا تلعب في عقله

لورد:

أنا كمانيكاح رجالي أحب أطمئنتك .. ما فيش ست تقدر تلعب بينا ولا

تضحك علينا

إlijانس:

ما تناولني حتة خشية أسخنها في الشمس شوية تدفي الأوضة

لورد:

تؤمري

يبتهد لورد بينما تنظر إlijانس لستار المنددهشة لأن لورد صدق

إlijانس:

شفتي؟ احنا هنروح ف دامية شكلنا

## يخرج عيسوي ووراءه مونيكاً من العمارة

عيسوي:

بس يا عم حكمت... وأنا بقى اللي ربيتها بعد المرحومة .. وقلت لازم  
ولا بد تكمل علامها .. آمال .. ده العلم مدرسة إذا أهملتها .. إن الحياة  
عقارب وثواني

مونيكاً:

يا سلام عليك يا حج عيسوي .. حكيم والله  
يدخل الطاروطي متجهاً للقهوة، إنه رجل ضخمة الجثة يرتدي  
عباءة على قميص وينطلقون

عيسوي:

المعلم طاروطي أهو .. يا معلم  
الطاروطي وهو يجلس على القهوة

الطاروطي:

أبو منصور .. مساء الفل

عيسوي:

آدي يا عم الشاب ابن الحلال اللي قتلتك عليه .. وعنده المانيكانوات  
جوه .. ما تبجي نتفرج عليهم

الطاروطي:

طب أشرب حجرين عشان استفرج عليهم بمزاج واستلقط عيويهم  
بعين مجهرية وتحليل معلمي

مونیکا:

لا هما لتويسين حضرتك .. ومتعاونين جدا

الطاروطي:

أفندم؟

مونیکا:

أقصد يعني مناسبين .. مناسبين جدا

عيسوي يشد الطاروطي من يده

عيسوي:

تعالى بس القهوة مش هتطير

مونیکا:

ما حضرتك دي معلومة معروفة يعني .. ما فيش قهاوي بتطير

عيسوي:

(يضحك) ها ها ها ها .. مش باقولك غلبان وابن حلال .. تعال

تعالى

يدخل الثلاثة إلى العمارة بينما يقتحم الكمان رجال "عرنوبي"  
البيلطحي ، يسود الذعربين الموجودين وينتشر الرجال في أنحاء المسرح

الرجال:

عرنوبي النوبي الأرتوبي

أبو قلب حديد وإدين طوبي

جاي ليكي يا حارة يا غدارة

هيولع فيك وهنتوي

يدخل عرنوبي سائرا بزهو ويكلم الجميع بوڊ ولطف

عرنوبي:

عرنوبي شرف وانسكم

قيدوا فوانيسكم

أنا الليلا دي هنا عريسكم

ونقوطي وجب

الرجال:

عرنوبي النوبي الأرنوبي

عرنوبي:

وغلاوتي راح ازيدها غلاوة

قولوا يا حلاوة

من النهاردة ولا أتاوة

ولا سرق ونهب

الرجال:

عرنوبي النوبي الأرنوبي

عرنوبي:

هتدفعولي الليي معاكم

كده برضياكم  
عشان تحزّم ولأياكم  
ترغي ف سيرتي

الرجال:

عرنوبي النوبي الأرنوبي  
عرنوبي:

وكل عيلة فيها ولدين  
ما كتيراتنين  
هياجرولي البكري يكون  
من رجالي

الرجال:

عرنوبي النوبي الأرنوبي  
عرنوبي بحزم وقوّة والرجال يجتمعون حوله  
عرنوبي:

كلامي ده على أي شنب  
وياقوله بحب  
والي عليه عرنوبي غضب  
يلبس كفته

الرجال:

## عرنوبي النوبي الأرنوبي

عرنوبي:

وكلكلم تحت وصايتي

وليكونا حمايتي

من كله إلا رجالي

لو يتجنوا

عرنوبي يتجه ناحية المقهى بينما رجاله ينتشرون في أنحاء المسرح

الرجال:

عرنوبي النوبي الأرنوبي

أبو قلب حديد وإدين طوبي

جاي ليكي يا حارة يا غدارة

هيولع فيك وهنتوبي

عرنوبي جالسا على القهوة، الرجال منتشرين في كل مكان

يجمعون الإتاوات من الموجودين، بينما يخرج عيسوي ومونيكا

والطاروطي من المنزل ومعهم منصوره

مونيكا:

طب هي فين المشكلة بس حضرتك؟

الطاروطي:

يا ابني فيه مانيكانات جديدة نزلت .. انت مش في الدنيا ولا إيه؟  
مانيكاناتك دي لامؤاخذه ألود فاشيون .. من العهد البائد .. ما بقاش حد  
يستنضفها

تطل إليجانس برأسها من الشباك ومعها المجموعة

إليجانس:

قلتلكو الواد مونيكاه ده هيجيبلنا الكلام وخلاص .. والطرنتووطي ده  
جاهل ولا بيضمهم

ستار:

لسه عندنا خطة تانية

منصورة:

طب ما هو من الذكاء إنك تفكر عكس الذوق السائد وتمشي عكس  
حركة القطيع يا معلم

الطارووطي:

قطيع؟ انت جايب بنتك تهزاني يا عيسوي

ماركو:

شكلها هتولع .. تعالي بصي يا فيرا

يحمل فيرا لتنظر، فيرا باستياء

فيرا:

أنا طلبت تشيلني؟ نزلني نزلت صواميلك

ينزلها

عيسوي:

ما هو انت برضه مش مدي نفسك فرصة تفكر يا معلم

مونيكاً:

بالظبط .. خد وقتك .. أنا مش مستعجل

الطاروطي:

فكرت .. وقررت .. مش حلوين .. ومش شاري .. وسيبوني أروح أملأ  
صدري بسموم الشيشة ع القهوة

لورد:

أنا عاجبي الراجل ده .. صريح جدا مع نفسه

شون:

وصريح معنا برضه .. واضح إتنا فعلا مش هنرجع مانيكانات

منصورة تواسي مونيكاً الذي يبدو عليه الضيق

منصورة:

انت حريا معلم .. معلش يا حكمت .. مصيرها تتعدل .. مش ده يعني  
صاحب المحل الوحيد في مصر

مونيكاً:

خير .. أنا متشكر قوي يا منصوره على ذوقك وتعبك

منصورة:

ما تقولش كده .. انت شكلك طيب قوي .. وأنا اللي بابا يعزه أعزه  
من غير ما افكر

ينظران لبعض ويتسمان بينما عرنوبي يقترب من منصوره  
وعيسوي ومونيكا والطاروطي

عرنوبي:

بندرح التماسي ونشقات السلامات ونشخلع الباي بايات يا حج  
عيسوي

الطاروطي متوترا

الطاروطي:

أنا دافع الشهرده يا عرنوبي والله

عرنوبي:

هو أنا وجهتك كلام؟ ثم انت مش م الحارة هنا .. ف مش في البلاك  
ليسته

يجري الطاروطي ناحية القهوة بينما عرنوبي ينظر لمنصوره  
ومونيكا

عرنوبي:

مش هتبل ريمي بقى يا حجوج وتديني الأوكيه .. وربنا أعمل فرح  
العيال دي تقوم بأحلى واجب فيه ويولعوا ولا خمسين علبه بريسول

عيسوي:

قتلتك أنا مش زي غيري يا عرنوبي .. ولا باخاف منك .. ولا هتهددني

عرنوبي:

أنا مش طالب أتاوة لا سمح الله .. أنا طالب القرب .. وعمال أصبر  
لحد السنيرة ما تخلص تعليم ما بيخلصش  
منصورة:

إنت البعيد أهيل؟

عرنوبي:

لأ .. البعيد أشول .. إيدي اللي ناحية قلبي هي اللي ممدودة .. وعايضة  
تكتب الكتاب .. عشان البعيد يبقى قريب  
منصورة:

قول للبعيد يفضل مكانه وما يقربش أكثر من كده لا يهزاً .. يلا يا  
حكمت

تدخل المازل ووراءها مونيكها، يوقفهما عرنوبي

عرنوبي:

وده مين بقى الكتكوت ده؟ شكله أطرى من إنه يبقى قريبكوا يعني  
عيسوي:

ما لكش دعوة بمنصورة يا عرنوبي

منصورة:

سيبه يا بابا .. ده خطيبي يا عرنوبي

إليجانس:

مش قلتكوا .. ألبت دي ناوية على نية سودا والله كلنا هنلبس

شون:

مش احنا لابسين أولريدي؟ قصيدك هنقلع بقى

عرنوبي مصدوما

عرنوبي:

عملتها يا عيسوي؟ جرحتي قلبي يا منصوره؟ قلبي اللي ما رضيتش  
أفسيه عليكوا .. ماشي يا بنت الناس .. أنا دلوقتي ندمان على كل لحظة ما  
عرفتش فيها واحدة عشان أفضل مخلص ليكي .. كانوا ثلاث تيام صعيين  
قوي .. بس خلاص .. انت بدأت الحرب يا عيسوي انت وبنتك .. وقابل بقى

يكلم رجاله بضيق

عيسوي:

يلا يا رجاله .. ولينا زيارة تانية هنا قرب

يخرج ووراءه رجاله

عيسوي:

انتي عملي كده ليه؟

منصوره:

كان لازم أقطعله لسانه بقى عشان يبطل اللي بيقوله كل شوية ده

يتنحى بها جانباً

عيسوي:

بس احنا لا نعرف أصل ولا فصل حكمت ده

منصوره:

ولا نعرف هو اسمه حكمت ولا لأ من أساسه .. بس أنا فهمتك أنا

عملت كده ليه .. وهو أنا يعني يا بابا اتخطبتله بجد؟

تنظر لمونيكا

منصوره:

ما حصلش لسه

تدخل للمنزل بينما يلتفت مونيكا للشباك

إيجانس:

ارجع يا مونيكا .. وانا حاجات لازم نعملها

ينظر مونيكا لمدخل العمارة حيث دخلت منصورة، ثم لحيث

انصرف عرنوبي، ثم للشباك، ثم ينكس رأسه في يأس

إظلام



## المشهد الثالث

المسرح مقسم لمناظر متجاورة والأضواء تتوزع حسب طبيعة الحدث الرئيسي الذي يتم التركيز عليه

المناظر كالتالي:

- مكتب موظف
  - كاشير في محل
  - فطاطري أمام طاولة
  - قهوة بلدي
  - فرد أمن أمام متشاة
  - بائع على نصيبة ملابس في الشارع
  - غرفة في عمارة تحت الإنشاء
- الجميع يقفون في وسط المسرح

مونيكا:

بدأ الجعد  
ولأزم حد  
ف حيلة يشد  
ويخطف شغل

ستار:

أنا عن نفسي  
هاقَطَع نَفْسي  
وهاقَطَع نَفْسي  
وهالقى الشغل

شون:

وأنا متشائم  
لكن لازم  
أعمل حازم  
والقى الشغل

ماركو:

أنا مش قادر  
بس هاغامر  
وأفضل اعافر  
والقالي شغل

فيرا:

وأنا مش طفلة  
دماغي مش قافلة  
أنا هاعمل حفلة

لو القى الشغل

لورد:

مئة المية

أنا ناوي النية

وفي الجمعية

هالاقى الشغل

إليجانس:

احلموا احلموا

بكرة هتندموا

مهما تقديموا

ما فهاش شغل

ينظرون جميعا لإليجانس بامتعاض، ويتفرقون في عدة اتجاهات

مونيكاً يقترب من مكتب الموظف

مونيكاً:

باشا .. سعادتك .. لو تسمجلي

الموظف:

خير يا مواطن .. ليه بتندهلي؟

مونيكاً:

عايز اتوظف

الموظف:

جاي تستطرف؟

مونیکا:

لأ والمصحف

جاي على مهلي

الموظف:

بص يا ننوس عين ماما

فيه هنا بيعي ألف موظف

مونیکا:

طب حلو .. الشغل أهو ياما

الموظف:

لأ .. أوعى .. كده بتخرف

كلنا بنظلم نياما

وف آخر الشهر بنصرف

عمولات .. بدلات .. وحوافز

علاوات زيادات شيء جايز

وكاننا خدنا جوایز

من غير صبحتنا ما تضعف

جاي انت يا حلو وعایز

تشاركنا نعيم الشغل؟  
جاي هنا باصص في الأكل  
في القنّة المحلوّلة حل؟  
برّة .. وما تعتمهاش!!  
تنتقل الإضاءة إلى الكاشير وستار تقف أمامه

ستار:

مساء الخير  
يا أعلى كاشير

الكاشير:

مساء النور  
يا بدر بدور

ستار:

ما فيش شغلانة  
ينوبك خير؟

الكاشير:

أنا قلت زيونة!!  
حمادة .. عبير  
شيلوها ارموها  
وئوجه ابوها

قولوله إلهي تدخل بيت جوزها

وتبيعي تشري من عندي جهازها

برّة .. وما تعتبهاش!!

تنتقل الإضاءة إلى الفطاطري وشون يقف أمامه

شون:

قولي يا شيف يا ابو الشفّات

عندك شغل؟

مممكن أشيل أربع شفّات

زي البغل

الفطاطري:

تعرف تعمل إيه؟

شون:

ما اعرفش

بس اتعلم

ما يخسّرش

الفطاطري:

آه .. تتعلم

ده أنت بتعلم

شحط طويل وعريض

وعواظلي

مش حدودي يا بيه

مش شغلي

برّة .. وما تعتمهاش!!

تنتقل الإضاءة إلى القهوة البلدي ولورد يقف أمام القهوجي

لورد:

أكنس وامسح

واشطف وانح

واجمع واطرح

وافرش كل جميع المطرح

القهوجي:

عندي عيال شغالة بزيادة

عربي وحربي وعلي وعبادة

روح يا حبيبي الله يسهلك

لورد:

أنا مش باشحت

القهوجي:

ولا انا فايقلك

برّة .. وما تعتمهاش!!

تنتقل الإضاءة إلى فرد الأمن وماركو يقف أمامه

ماركو:

في اليوم الواحد

ستأثر ساعة؟

طبعاً بهزر

فرد الأمن:

بسر هتتسلى

تسمع في إذاعة

براديو ترانزستور

ماركو:

طب الأقي مقاسي؟

فرد الأمن:

وهتلقي مآسي

وبلاوي توثر

حرامية كتار

ناس تضرب نار

وفيه أخطر وأخطر

ماركو:

كنه فاضل حاجة

لبسكوا ليه أزرق؟

مش موف أو أخضر؟

فرد الأمن:

ليه ما بتفهمش؟

ليه ما بتطفشش؟

ليه غاوي تستحمر؟

برّة .. وما تعتهاش!!

تلتقل الإضاءة إلى البائع على نصبة الملابس واليجانس تقف

أمامه

إليجانس:

طب بس أسمعني

طب فكر فيها

لبسني الطرحة

وأنا أقفلك بيها

البائع:

لأ ناصحة يا بت

فاكراني عبيط

وهاشوقك ارّيل

ومعاكي أزيط

إليجانس:

ده أكنك عامل

عرض لأزياء

البائع:

فاكراني أفندي؟

ده أنا م الوراق

إليجانس:

طب ماله كلامي؟

هات طرحة وشنطة

وأديك هتشوف

البائع:

أنا كنت حرامي

ففهمت الخطة

إليجانس:

اعمل معروف

البائع:

غوري بقى لأديكي

لاحسن مش طالبة

ده أنا أول واحد

يفرش في العتية

برّة .. وما تعتبهاش!!

تلتقل الإضاءة إلى الغرفة التي تحت الإنشاء، تدخل فيرا ومعها

ولدين

فيرا:

فين هو الشغل؟

ولد 1:

كتّف يا زُمّل

فيرا:

طب ليه الشّر؟

ولد 2:

اكتم يا قمر

ولد 1:

هنقطع فيها

ونبيع كلاومها

ولد 2:

خدرها الأول

بعدين شقّها

الولدين:

فرصة .. وما نضيعهاش !!  
يكتمان نفس فيرا بمنديل

إظلام

## الفصل الثالث

### المشهد الأول

غرفة البدروم، المانيكانات كلها موجودة ما عدا مونيكا وفيرا،  
الجميع ثابتون، بينما عيسوي يقوم بتلميعهم واحد واحدا  
عيسوي:

غلبان الواد حكمت ده .. بيلف على كعوب رجليه م الصبح .. والجو  
هنا رطوبة أنا عارف .. ما تعلقوش .. أنا هاظبطكوا واروقكوا .. أهو خدمة  
للغلبان ده

يقترّب من ستار، ينظر لها قليلا

عيسوي:

والله انتي دونا عن كل المانيكانوات دي صعبانة عليا .. ده أكنك بني  
أدمة لحم ودم وروح

يزيل خصلات شعرها عن وجهها

عيسوي:

شبه المرحومة أم منصورة والله .. أكنك هي ف شبامها .. عشان كده  
.. ليكي معاملة سوبر دونا عن الباقيين

إليجانس:

ما تنجزيا حج

يلتفت عيسوي مفزوعا لمصدر الصوت، الكل ثابت، ينظر للشباك

عيسوي:

العيال ولاد العفاريت تلاقهم بيلعبوا في الشارع .. ده أنا قلت والله  
انتوا ملبوسين ولا حاجة

ينظر في الغرفة قليلا

عيسوي:

هي الأوضة برضه مقفولة بقالها سنين السنين .. فاحتمال يعني ....

ينظر للموجودين بقلق، يفتح الباب ويدخل مونيكاً بسرعة، يفرع

عيسوي

عيسوي:

إيه يا عم .. ما تخبط ولا تستأذن ولا حاجة

مونيكاً متعجبا

مونيكاً:

هو أنت بتعمل إيه هنا يا حج؟

عيسوي:

هاه .. إله .. كنت .. كنت باشقّر ع البضاعة بس .. ها .. قولي .. ربنا

كرمك؟

مونيكاً:

لسه يا حج .. بس خير .. هانت

عيسوي:

هي البت الصغيرة فين؟

مونیکا:

فيه واحد بيص عليها .. ولو عجبتة هياخذها

منصورة تطل من الباب

منصورة:

الغدا يا بابا

عيسوي:

حاضر حاضر

ينظر لستار

عيسوي:

ما تقلقش ع البضاعة .. هي هنا ف أمان .. وأنا والله حبيتهم أكثرهم

سكان عندي .. وهابقى آجي أتظمن عليهم على طول

ينصرف، منصوره تحدث مونیکا

منصورة:

مش ناوي برضه تيجي تتغدى معنا؟

مونیکا:

شكرا .. سبقتكوا

منصورة:

كذت إيه؟

مونيكَا:

كريم صَبَّار

منصورة:

إيه؟

مونيكَا:

!!!! .. آيس كريم . آيس كريم بالصبار .. لطيف جدا .. ابقى جريه

منصورة:

ماشي .. ومش هابطل أزن عليك لحد ما تيجي تاكل عندنا مرة

تخرج منصورَة، يتحرك الجميع ويلتفون حول مونيكَا

ستار:

ها .. ما لقيتهاش برضه؟

مونيكَا:

لأ .. لفيت علمها كل مقالب الزبالة وبصيت على كل المحلات اللي  
قدرت أوصلها .. ما لهاش أثر

شون:

دي علامة النهاية .. احنا كده هنضيع واحد ورا الثاني .. أنا متأكد

ماركو:

البت دي مع إنها لسانها طويل .. بس صعبانة عليا

لورد:

قولتلكوا .. كنا نترص قدام الجمعية المخفية للملابس الزفت وكان  
زمانا كلنا بكرامتنا ف فتارين .. دي حكومة .. ما هيصدقوا يلاقوا حاجة  
ببلاش

إليجانس:

وكانوا رموك م الأول ليه .. البني آدمين دول مالهمش أمان يا لورد  
طرقات ضعيفة على الباب، يثبتون جميعا بينما مونيكا يتحرك  
ببطء ورؤوسهم تتحرك معه

مونيكا:

مين؟

صوت فيرا:

افتح يا مونيكا

الجميع:

فيرا!!!

يجري مونيكا ويفتح الباب، تدخل فيرا وهي تحمل ذراعا في يدها،  
يلتفون حولها

ستار:

إيه اللي حصلك؟ مالك؟

إليجانس بقلق

إليجانس:

حد شافك وانتي داخلة؟

لورد:

أحنا ف إيه ولا ف إيه؟!!

شون يمسك ذراعها المفصول

شون:

يا نهار اسود!! يا نهار اسود!! إيه اللي حصل؟

ماركو:

أنا لا قادر أسمع ولا أشوف ولا اتكلم

مونيكا:

اتكلمي يا فيرا .. جراك إيه وكنتي فين؟

فيرا:

أنا كويسة .. المفروض تتطمئنا على اللي خطفوني

ستار:

خطفوكي؟!!

فيرا:

آه .. عيلين كده راكبين توك توك

شون:

إيه التون توك ده؟

فيرا:

حاجة شبه خوذة الموتوسيكل بس بعجل .. قالولي هنجيبلك شغل ..  
وخذوني مكان مهجور في أرض زراعية .. وحاولوا يخذروني

لورد:

يخضروكي عشان ما تبانيش م الزرع يعني؟

فيرا:

يخذروني .. يشمموني حاجة تخليني أدوخ وأسورق يعني .. طبعا ما  
حصليش حاجة .. فجأة واحد فيهم طلع سكينه وقال لصاحبه "ع  
الصاحي يا منقلة .. ع الصاحي" .. اكتشفت بعد كده إن منقلة ده اسم بني  
أدم عادي .. وع الصاحي دي يعني يفتحوا بطني وأنا صاحبة

ماركو:

أنا مش قلت مش عايز أسمع؟ أنا ممكن أجيب كل السيليكون اللي  
ف بطني دلوقتي

إليجانس:

وهما عايزين يفتحوا بطنك ليه؟

مونيكا:

هيعملوها حصالة مثلا؟ أكيد عشان يهربوا جواها أي حاجة .. يا  
عيني يا فيرا .. كانوا هيحشوكي

فيرا:

لأ .. يفتحوا بطني عشان ياخذوا من جوة الكلى والكبد والقلب وأي  
حاجة يلاقوها ف سكتهم

شون يلقي الذراع أرضا ويتحسس بطنه

شون:

إيه؟ أنا مش مصدق!! احنا عندنا حاجات من دي وما نعرفش؟

فيرا:

احترم دراعي لو سمحت .. ولأ طبعاً ما عندناش .. عشان كده أول ما  
ضرب السكينة واتنت جوه بطني الواد صوّت .. والتاني جه يجري مسكت  
فيه فضيل يعاقر لحد ما خلع دراعي معاه .. شاف الذراع ماسك فيه  
لوحده وأنا باجري وراه طب ساكت

ستار:

وانتي رجعتي ازاي؟

فيرا:

بالتوكتوك

إليجانس:

عرفتي تسوقيه؟

فيرا:

طول عمرهم بيرموني جواه وأنا رايحة من محل للتاني .. حافظاه

يعني

مونيكاً يقف مذهولاً

مونيكًا:

البنّي آدمين دول أخطر حاجة شفتها ف حياتي .. دول أخطر م  
الاسبراي الي ما بيتمسحش ده .. تخيلوا إنهم ممكن يسرقوا أعضاء  
بعض!!!

إليجانس:

مش معقول .. أكيد دول مجانيين .. استحالة يبقى فيه حد طبيعي  
كده

ماركو:

كل اللي شفتم ما حدش فهم عايز خير لحد .. كده خلصت الحدودة  
.. احنا نرجع الجنيّة ونستني الكلاب ترش علينا مية بقى  
ستار:

طول الوقت فيرا يتحذرننا منهم واحنا ما سمعناش كلامها .. بس أنا  
كمان دقت كتير .. انتي كنتي صح يا فيرا  
لورد:

مش كلهم والله .. عندكوا الراجل الطيب اللي احنا ساكنين عنده ده  
شون:

آه .. اللي داخل طالع عمال يبصص لستار وناقص ياخدها بالحضن  
ستار:

لا يا شون .. ده راجل غلبان .. أنا بس بافكره بوقت كان مبسوط فيه  
.. والظاهر إنه وقت كان البني آدمين فيه غير البني آدمين دلوقتي

مونیکا:

أحنا مالنناش قعاد هنا

فيرا:

هنعمل إيه .. ما احنا مالنناش فتارين نروحلها كمان

مونیکا:

ولو سبنا نفسنا كده هنفضل ميت سنة زي ما احنا .. وأنا مش  
هاقدر استحمل عن نفسي

شون:

قصيدك؟

مونیکا:

آه .. نخلص من نفسنا .. والحل الوحيد هو إننا نتكسّر تحت صغيرة  
ونخش الفرن .. وأنا عارف هنعمل كده فين

ماركو يممسك بالبايور

ماركو:

أهو .. نولع في نفسنا على طول .. ودلوقتي .. وهنا

ستار:

لأ .. مش في بيت الراجل الطيب ده

مونیکا:

الراجل وبنته .. دول مش شبه الباقيين فعلا

إليجانس:

بنته .. آه .. صبح

مونيكَا:

أنا خارج .. فيه مقلب كبير بيحرقوا فيه الزبالة .. عرفت مكانه وأنا

بادؤور على فيرا

فيرا:

الله يكرمك

مونيكَا:

أنا هاروح هناك .. واللي عايز يحصِّلني .. هاسيبله الباب مفتوح

يخرج مونيكَا، ينظرون لبعضهم

شون:

أنا ما حدش م النبي آدمين دول عاملني كويس .. لا وأنا شمههم ولا

حتى لما كنت مانيكَا

يخرج

لورد:

مش هاقاوح .. لو كان فيهم خير كانوا قدروا السنين الل فضلت

واقف فيها في الفاترينة وبالبس لهم البيجامات والبدل والجلاليب

والترنجات .. ده أنا فضلت سنتين لابس بدلة صيفي لونها أصفر!!

يخرج

ستار:

أنا رايحة مع مونيكَا .. أنا كمان ما عديش أمل ف حاجة

تخرج

ماركو:

كان نفسي أحرق نفسي هنا وخلص .. أريح .. بس طالما بدأنا سوا ..

يبقى نخلص سوا

يخرج

تنظر إليجانس لفيرا

فيرا:

إيه رأيك يا إليجانس؟

إليجانس:

أنا كان نفسي أبقى واحدة منهم .. دلوقتي مش عابزة أعيش معاهم ..  
كفاية اللي شفته وأنا باحاول أبقى وسطهم

تنظر بعطف لفيرا

إليجانس:

وكفاية اللي شفته انتي كمان

تحمل فيرا

إليجانس:

يلا بينا

تخرج بها، الإضاءة تخفت وتظل للحظات مركزة على ذراع فيرا  
الملتقى على الأرض، تدخل يده مونيكا وتحملها

إظلام

## المشهد الثاني

الحارة ليلا، الجميع يقفون أمام المنزل

ماركو:

يا مونيكا احنا دخلنا وخرجنا ميت مرة لحد دلوقتي .. أنا كده مش  
هاسيح م النار .. هاسيح م المجهود

مونيكا:

لازم ما حدش يحس بينا واحنا خارجين .. ولازم كمان نوصل هناك  
وهما مولعين النار عشان نترمي فيها على طول .. وما حدش يلحق يمنعنا

ستار:

طب والوقت ده إمتى؟

مونيكا:

ممکن نتحرك دلوقتي

شون:

وداعا يا دنيا .. كان نفسي نكمل سوا .. بس انتي تستاهلي حد أحسن مني

لورد:

أنا رأيي نمسك ف إيد بعض ونترمي سوا

فيرا:

هو احنا داخلين نعمل نمره؟ انجزيا عم لورد الله لا يسينك

إليجانس:

أنا آسفة يا مونيكا لو كنت ف مرة ضايقتك ولا حاجة

مونيكا:

مرة واحدة؟

إليجانس:

ده انت شايل مني بقى

مونيكَا:

عيب يا بت .. ده انتي اختي

فجأة يقطع حديثهم دخول عرنوبي ورجاله

عرنوبي:

الله الله الله .. ده الدونجوان هنا أهو .. ومقضيها هي ومئ وبرئ ..

مونيكَا:

عايز إيه يا باشمهندس عرنوبي؟

عرنوبي:

أنا مش باشمهندس يا حيلتها .. ومين دول إن شاء الله؟ مش دول التماثيل اللي كنت بتقول إنك بتبيعهم؟ ده طلّعوا بني آدمين يا رجالة .. يعني الظُّرُوبَة ده بيستغلنا ف حتنا ومكيسنا كلنا

مونيكَا:

أرجوك قول كلام مفهوم عشان اعرف أرد عليك

عرنوبي:

ما فيش كلام يا كتكت .. العرنوبي رجل أفعال لا أقوال .. وأنا جاي أحرق البيت باللي فيه .. ولو انت مش فيه تتحرق برضه

مونيكَا:

والله ده كلام هايل .. بس يا ريت بعيد عن البوابة عشان حرق البلاستيك ما يطلعش على منصوره والحج عيسوي يضايقهم بس .. ممكن قدام القهوة هنا (يكلم الجميع) فُرِحْتَ يا رجالة

عرنوبي:

انت بتتريق عليا ياض؟ (يكلم رجاله) بستك عليهم يا رجاله  
الرجال يلتفون حول الجميع وعرنوبي يتفرد بمونيكا

عرنوبي:

بقي عامل فيها دكر  
وشريس ولون وخطر  
طب وعد ما حدش يلقى  
للضوفر منكوا أتر

مونيكا:

لو جدع اعملها .. يا ريت  
عمري ف يوم ما اتمنيت  
غير يولع بيا البيت  
إنما قلت أقصر شر

الرجال:

طب نعمل إيه يا زعيم  
نقلها ف ثانية جحيم؟  
ولا نعلقهم بالمقلوب  
أدينا قوام السيم

عرنوبي:

الحيلة دهوه سيبوهولي  
وبتاري الغالي خدولي

قطعوا فمهم جزلاً جزلاً  
حشوا دماغهم وأدوي  
يلتفون حول المجموعة ويخرجون سيوفا من ظهورهم ويبدو أنهم  
ينهاون عليهم بها  
مونيكاء:

طب ليه تحرمي اتقطع  
ما أنا جاينك اهو ومستبيع  
وباقولك ولّع فيا  
ولا رافض ولا متمّع  
عرنوبي:

روح صبيع على واحد تاني  
ده أنا عرنوبي الشنواني  
اتقفلت ليا شوارع  
واتهدت ليا مباني  
هتشوف ولأول مرة  
مصارين اصحابك برّة  
وهاسيبك هنا تلبسها  
مبروك البدلة الحمرا  
الرجال ينفضون من حول المجموعة، أشلاؤهم مبعثرة في المكان  
الرجال:  
ده ما فيش ولا نقطة دم

مع إن الواحد فهم

متبعتر ما بيتلم

عزنوبي يقترب من الأشلاء ويتأملها، الرؤوس متناثرة على الأرض

إليجانس:

قالك ما تولّع واخلص

شون:

لا انت اطرش ولا هوّ اخرس

ستار:

وركبت دماغك برضه

فيرا:

حقه .. ما اللعب ف أرضه

ماركو:

لو تسمع هات النار

لورد:

يا هازعق بالأشعار

لورد وكأنه يلقي شعرا

لورد:

المانيكان اللي حاول ف يوم .. يقوم من النوم .. ما لقاش قدامه  
علامة .. غير لسكة الندامة .. ولساك يا زمن بتجرحه (يكلم الموجودين) يا  
سلام .. حلوة لساك دي .. الواحد مستواه بيتطور .. كده فاضلي مشربية  
وطراطيف وبوح وأطبع ديوان على طول

عرنوبي يفقد صوابه هو ومن معه

عرنوبي:

الواد ده مخاوي يا رجاله .. أستغفر الله .. أعوذ الله .. الحمد لله ..  
أقول إيه حد يمليني

مونيكاً:

قول إنك مش مترجع هنا تاني

عرنوبي:

مش راجع يا مولانا .. مش راجع

مونيكاً:

لا انت ولا حد من رجالتك

عرنوبي:

ولا حد من عيلتي ولا من ذريتي .. ده لو خلقت أصلاً بعد اللي شفته

ده

يبتعد مسرعاً هو ومن معه

عرنوبي:

السماح يا اهل السماح .. الله أكبر .. الله أكبر!!!

مونيكاً يقترب من الأشلاء ويكلمهم

مونيكاً:

أنا آسف .. افكرت إنه ممكن يساعدنا

لورد:

مش مهم .. المهم تلحق تلم اللي اتنتور ده

ستار:

وحاول تريكبنا صح أرجوك

شون:

آه .. عشان ما الاقيش راكبلي دراع لورد ولا رجل ماركو

مونيكاً:

حاضر

يهم بجمع الأشلاء، ولكن ظهور عيسوي ومنصورة وعدد من أهالي  
الحي يوقفه، يجري عيسوي نحوه ويحتضنه

عيسوي:

رينا يكرمك يا حكمت .. نجدتني ونجدت بنتي .. وخسرت أعز ما تملك

مونيكاً:

لا والله ما حصل حاجة .. عرنوبي ما لمسينش

منصورة:

بابا قصده إنك ضحيت بالبضاعة بتاعتك كلها

مونيكاً:

لا عادي .. فداكي وفدا سلامتک

إليجانس:

آه يا ابن ال ...

عيسوي:

بص يا حكمت .. انا هاخلي الطاروطي يشترهم غصب .. ولو ما

عاهوش فلوس هاخلي أهل الحقة كلهم يدفعوا تمنهم .. موافقين يا

رجالة؟

الجميع:

موافقين طبعاً

عيسوي:

ده انت خلصتنا من التعبان اللي ما حدش عارف يطرده من سنين  
ماركو:

عقبال التعابين اللي في البدروم  
مونيكا:

حيث كده .. أنا كنت شايل مانيكان تاني جوه .. هاستأذنكوا أخش  
أجيبه

يتجه للداخل بينما عيسوي وأهل الحي يجمعون الأشلاء  
منصورة:

أنا جاية معاك  
مونيكا:

مش هينفع .. أصل .. أصل  
منصورة:

إنت .. عارفة  
مونيكا مصدوما  
مونيكا:

عارفة؟!!!

منصورة:

آه .. عارفة يا .. يا مونيكا  
مونيكا:

ازاي؟

منصورة:

البدروم مفتوح ع المنور .. وانتوا بتقعدوا طول الليل تتكلموا .. لإنكوا  
ما بتناموش طبعاً .. وأنا كمان باقى قاعدة باذاكر .. وباسمع كل حاجة ..  
غصب عني .. شون ده سهوته عالي قوي  
مونيكا:

وما خُفتيش؟

منصورة:

إنتوا ما يتخافش منكوا .. اللي يتخاف منهم هما البني آدمين .. إنتوا عاملين زي الأطفال .. ما اتلوثوش .. البني آدمين كمان المفروض يفضلوا كده .. بس للأسف .. كثير منهم بيقتلوا الأطفال اللي جواهرهم .. فبيتحولوا لوحوش

مونيكا:

أنا مش فاهم حاجة .. بس حاسس إنه كلام كويس

منصورة:

آه يا مونيكا .. كلام كويس

مونيكا:

طيب .. ممكن بقى أستأذنك تدي المانيكان الأخراني لبابا؟

منصورة:

طبعاً

يتسمر مونيكا أمامها في وضعية المانيكان، تنتظر له قليلاً

منصورة:

مع السلامة يا طيب .. أنا عارفة إنك سامعني .. يا خسارة .. ما عارفناش نقبلكم وسطينا .. مش عشان انتوا مش شهيئا .. لأ .. عشان انتوا شبه حقيقتنا اللي احنا مش عايزين نبتاها .. عشان خايفين نبقى صافيين زيكوا كده .. إنتوا الحقيقيين .. واحنا المزيفين .. إنتوا كنتوا بني آدمين أكثر منا

تلتفت منصورة لعيسوي

منصورة:

بابا .. المخزن الصغير اللي انت مأجره جراج للتكاتك ده .. إيه رأيك  
نفتح فيه محل هدموم صغير؟ وأدي حكمت خدمنا وسابلنا المانيكانات  
أجرة ما قعد عندنا اليومين دول .. يبقى نلمهم سوا في مكان واحد واحد  
بقى

تنظر لمونيكا

منصورة:

نحطهم في المحل مع المانيكان اللي شبه حكمت ده .. المانيكان الحلو  
اللي كان مخبيه

ينفض أهل الحي من حول الأشلاء وقد جمعوها، جميع  
المانيكانات ثابتة الآن، تهم منصورة بحمل مونيكا بينما بهم الجميع  
بحمل المانيكانات المتبقية في نفس الوقت

إظلام

سنار